

## Sillogismos ladinos pagu làdinos

Unu sillogismu, dae su greco *sylogizesthai* ("dedurre"), a la nàrrere che Aristotele, est unu manera logica de resonare chi est fata de una "premissa" dae uve si nde balanzat po dedutzione una idea de accabu ateretantu netzessària chi colat intre una chistione mèdia.

Nàndelu in manera prus làdina, faghende unu esemplu, si podet pessare chi nois sardos morimus che a totus sos àteros gràssias a custu resonamentu

"totus sos òmines sunt mortales" (premissa mazore),

"sos sardos sunt òmines" (premissa minore),

"sos sardos sunt mortales" (idea de accabu).

Chie sighit custa manera de resonare peroe depet sèmpere èssere coerente e connòschere sa realidade de cussu chi s'impitat in su sillogismu pro non corriere in trampas mannas, ca si su comintzu est isballiadu, isballiadu at a èssere fintzas s'idea de accabu.

Nàrrere difatis:

"totus sos òmines sunt biancos" (premissa mazore),

"sos sardos sunt òmines" (premissa minore),

"sos sardos sunt biancos" (idea de accabu),

podet pàrrere una cosa chi resultat in sa realidade ma chi partit dae una "premissa" chi, a su mancu po onestade intellettuale, no est bera ca ischimus chi non totus sos òmines sunt biancos.

Como, dae pagu tempus, s'intendet chistionare de modellos de politica limbistica in sa pubblica aministratzione po sa Sardinna chi benint croppados a sa terra nostra in d-una manera sillogistica chi pagu tenent ite apitzigare cun nois. Po fàghere unu esemplu si pessat chi in sas baddes ladinas de su Trentino-Alto Adige, antzis solu in Alto-Adige, si siat agatada sa medighina po sanare sa Sardinna e sa limba sarda in custu terrinnu croppàndenos a sos issèperos issoro.

Apustis s'at a biere passu-passu cale sunt sas faltas de su resonamentu, pro como sighimus custu sillogismu:

-In Alto Adige tenent duas bariantes de ladinu in sa pubblica amministratzione

-Sa Sardinna e s'Alto Adige tenent su sardu e su ladinu cumente limba de minoria.

-Sa Sardinna diat a deper tènnere duas bariantes de sardu in sa pubblica aministratzione.

A chie no agradat su ziru de su molente no ant a agradare nemmancu custos brincos de capra "approssimativi".

Apo nummenadu solu s'Alto –Adige (provintzia autonoma) e non puru su Trentino (àtera provintzia autònoma de una matessi Regione) pro su chi apo a narrere como.

Ammento a sa lestra a chie leghet chie sunt sos ladinos e cale est sa realidade issoro essende istau in ive cumente istudiosu:

sos chi chistionant ladinu sunt partzidos in difenentes realidades sotziales (in Alto Adige sos tedescos sunt prus fortes de sa parte italiana, in Trentino e Belluno su cuntràriu) e fintzas in difenentes realidades aministrativas; tres provintzias (Alto-Adige, Trentino e Belluno) duas Regiones (Trentino-Alto-Adige, Veneto).



Custa tripartizione est comintzada in su 1923 cando Ampezzo, Fodom e Col sunt istados postos in sa provìzia de Belluno e est sighida in su 1927 cando sa Val di Fassa est istada posta in sa provìzia de Trento, e Val Gardena e Val Badia in cussa de su Alto-Adige. Custu cheret narrer fintzas collègios elettorales difenentes chi non cunsentit rapresentantzia de totus sos ladinos. In su 1989 grassias a s'interessu mannu de s'Union Generela de sos ladinos, ca a Bolzano su bonu de sa zente tedesca e italiana non lu cheriat, sa limba ladina est intrada in sa pubblica aministratzione in Val Badia e Val Gardena e in su 1993 est intrada fintzas in Val di Fassa de Trento. Cadiuna cun sa variante sua. Custu issèperu de sas variantes peroe no est sa voluntade de sos ladinos, chi ant zai fatu unu istandard cun su prozetu SPELL (servitziu de pianificatzione e elaboratzione de sa limba ladina) cun su traballu comintzadu dae su istudiosu Heinrich Schmid, ma est s'interessu de tedescos e italianos po sighire sa "assimilazione" de sos ladinos. No est de badas chi propiu dae s'Alto Adige siant bènnias sas criticas prus manna a su Ladin Dolomitan, su prozetu de istandardizazione. Unire sos ladinos cun sa limba, galu prus in sa pubblica aministratzione est periculosu meda po su prozetu de "tedeschizazione" de cussas baddes chi galu como sunt dividias in duos comprensorios difenentes! Una prova-provata la tenimus in su 2000 cando est istadu mudau su Istatudu de Autonomia: a sos ladinos de sa provìzia de Trento benit dau su colleziu elettorale a sos de Bolzano (Badiotos e Gardeneses) nono. Custos ùrtimos otenint sa possibilitade de intrare in sa zunta provinziale ma solu si sa maioria est cuncorde. In d-unu clima de discriminatzione in su 2003 "*cun decretu de sa zunta privintziale benit refudau in sa pubblica aministratzione sa limba unitària Ladin Dolomitan*" dae una maioria chi non cheret sos ladinos e non los at fatos intrare in zunta! Sos italianos de parte issoro non chereant chi sas baddes de Belluno si croppent cun sas de s'Adige Artu ca in cue depent sighire s'àndala de "italianizzazione".

Nàrrere chi in Val Gardena e in Val Badia su ladinu funtzionat cun duas bariantes in sa pubblica aministratzione est duncas a ofèndere sos ladinos e resonare che tedescos. Nàrrere poi chi custa situatzione pothat funtzionare finas in Sardinna acostiande logudoresu-campidanese a su badioto-gardenese (sic!), no est unu sillogismu ma unu volu de Pìndaro. Como, a mene resultat chi sa Regione Autònoma de sa Sardinna siat unu ente aministrativu unicu e unicu siat su pòpulu sardu chi rapresentat: a parte sos italianistas chi bi sunt in terra nostra, non bio tedescos chi cherzant sa Sardinna partzida in duos po ordire unu prozetu de tedeschizatzione e duncas tocat a pessare chi si sos nemigos de s'unitariedade sarda non sunt in foras bolet nàrrere chi los tenimus in intro. E custu emmo, làstima, chi est unu sillogismu zustu!

17/01/2006

Micheli Ladu

